

TIMOT WÛR

Mam Pawrô Jõ Kàhhôc

Ûhÿ, pê Pawrô pê Jeju jarkwa na memprar catêjê nõ, ne ajco pjê cunea kam apu ipa. Ne mehcunea mã Jeju pê me pahkritxwÿ na ajco harên to ipa. Pé Juta catêjê ma ame Jeju jÿjarên xà ita par caca. Cwÿrjapê pê me Pawrô pro, ne Roman catêjê mã cugõ, ne pê me hacjên xà kam me haxà. Mã Pawrô cator jirô pê hipêr mehcunea mã Jeju pê me pahkritxwÿ jarên xà impejti jarên tomõ, na ri hipêr Roman catêjê te Pawrô pro ne me haxàr, me hacjên xà kam. Mã hõtpê cute mehkwy mã ihkàhhôc ita ton ne ma ihkujahêc.

Ne pê hÿmre nõ japry pê Timot Pawrô kôt Jeju pynâr ita na, cormã intuwre. Ne cupê Pawrôtehcajpar catê, ne ajco kôt apu ipa. Jirô pê mã pê Pawrô Epet jõ krĩ kam Jeju na mehkwy mehkrĩ atajê to ihhimpej catê na Timot xãm. Ne pom cu me hõ kàhhôc pijakrut cahyt itajê kam, pê PawrôTimot mã, por mehkwy mã ampo kên to hahkre atajê cahpêrhÿr na awjahkre. Na pê mam hõ kàhhôc ita japry pê **Timot Wÿr, Mam Pawrô Jõ Kàhhôc** (1 Timot).

Ne hanea ne cumã cute mehkwy jamâr catêjê impeaj pyxwÿr, mã cute me hamâr to impejti na hÿjahkre. Ne nee Timot te jÿ caxuw Pahpãm mã hàpênjicu nare na cumã hÿjahkre.

*Pê Pawrô Timot mã amji jarẽ
Me Hàpên Xà 16.1-5*

¹ Ỡhỹ, ipê Pawrô, por Jeju te ihkujahêc ata, pa wa. Pahpãm pê me pahkên pê me pahto hapôj catê, ne ihcãmter pê Jeju Crixto te hacpỹa ne amji jaxàr xà ata, cu pahtỳj me hikaj ata jarkwa kôt wa apu ipa.

² Ỡhỹ Timot, apê ihhêj rũm ikra. Ampo na? Ca ikôat Jeju to amji mã ahimpej to apa, cwỳrjapê wa ha amã ihhêc. Ne ahpỹanre na ampo itajê cunea na amãihhêc partu. Ne wa apu Pahpãmme, me pajô Pahhiti pê Jeju Crixto mã me acajrên, ne me cumã:

— Me to amji pytà ne me hamã, ne me caprĩ, ne me caxwãm pê me cumã acarĩcre gô — hane.

*Pê Pawrô Timot mã me hapackre kên xà cawpa
Roman 16.17; Tito 1.5-6*

³ Ỡhỹ, imã Epet jô krĩ kam gàhhuc na ato prãm, ita to pê wa ramã Maxeton jô pjê wỳr itêm xà xwỳjrea na amã icakêc. Ne Epet jô krĩkam mehkwy te hãn ne ampo to me cumã hahkre xàcupan xà itajê to pit mã ame cumã hahkre to me ipa. Ne caa, ca ha atỳj ita tête me cumã, qué me ita ton jicu.

⁴ Na ca ha me cumã gũjarên to hane he:

— Ca rỳ pêa mã ame aquêtjê te amji kam hapac xà itajê me, me haprỳ na ihhêc japjêhti atajê to pit mã ame hahkre prãm to me apa. Nee ca ameita ton nare. Nãmri ca hãn ne ame ita to, ne teeincwỳrjapê ame apijapu to prãm. Ne Pahpãm mã ihkôt me papa na me pahto prãm, ne pomate me ampo to hahkre xà itajê, nee

Pahpãm kôt mepapa na me pahtehcajpar nare. Ne quêt Pahpãm meharkwa to, cu ha amji mã me pahhimpej, ne pahtỳj hỹrmã ame pajapôj — hane.

⁵ Ne wa apu amã ihimpej xà itajê cunea to hahkre, mår quê Jeju na mehkwỳ pê me pahkwỳ cunea mã cute me ajpẽn kїн xà to ajcamẽ. Cu ha me pamã ampo kên na prãm nare na, cu ha pahtỳj ame ajpẽnkїnti ne. Cu ha ame amji kampa, ne pahte ramã ame ampo tonitajê kôt me amji kôt hakop, ne nee amji jũ na me pahpahàm nare na, cu ha pahtỳj ame ajpẽn kїnti ne. Cu ha ampeaj kam Pahpãm to ame amji mã me pahhimpej na, cu ha pahtỳj ame ajpẽn kїnti ne.

⁶ Ne mehkwỳ te ramã me Pahpãm jarkwa cupan, ne ihcaprỳ na me harkwa cakrô to ame ajpẽn mã mehhimpej.

⁷ Ne ihtỳj cumã cute amjito me cumã Pahpãm jarkwa to hahkre catê na me amjito to me prãm, por pê Pahpãm Mojxe xwỳ mãharkwa to hahkre ata to. Ne camaampo to amehcakôc atajê jahkre pej nare kam ame to ihcakôc, ne nee hãn ne me harkwa na meamji par nare. Ne ihhêj ne ampeaj kam me harkwa atajê na me cumã amji jahkre pej, ne nee ahna me cumã amji jahkre pej nare.

⁸ Pê Pahpãm Mojxe xwỳ mã ihhimpej xà impejti kên nare ata gõ, na pahte ramã me hahkre pej.

⁹⁻¹⁰ Xà ajkї catyt kam me ipa catêjê caxuw pê ihhimpej xà ita to ihhimpej? Hãpà. Por cute me pry rên xiti atajê caxuw pê ihhimpej xà itajê to he. Ihtỳj amjia kôt ame ipa catêjê me, me

hũpar nare catêjême, Pahpãm to me amji kam hapac nare catêjê me, mehkrã kêanre catêjê me, Pahpãm to me amji prãr catêjê me, nee cute me Pahpãm Carõ Pejti imparnare catêjê me, cute me hũmxwÿa curan catêjê me, mehwÿa curan catêjê me, ahti na mehphahàm nõ catêjê me, me hũmrea te me ajpẽn caxun catêjê me, pyjêa te ajpẽn to inxy catêjê me, ahti na cutemehkwÿ to ihpore na me hàhpan prãmcatêjê me, mehjhêj xi catêjê me, mehcukij catê cunamã mehwÿ to mehjhêj xi catêjê me, Pahpãm jarkwa to hahkre xà cuna mã mehcakôc kên catêjê. Ne mehcunea te me hajÿr xà catêjê itajê caxuw pê Pahpãm Mojxe xwÿ mã ihmipej xà ita to.

¹¹ Ne Pahpãm catihtti, ne impejti atate ri amji mã icapi, ite me amã ihkraJeju pê me pahkritxwÿ jarẽn xà impejti to harẽn to ipa xà caxuw.

*Pê Pahpãm Pawrô caprĩ pyrên hakry
Me Hàpên Xà 26.9-18*

¹² Cute icapi ne amji mã ipej na ito hajÿr, ne amji mã cumã hàpên catê na iton. Me pajõ Pahhitipê Jeju Cixtô te hàpên xà ita caxuw imã icarôtton, ne imã hõr, wa carôat kôt ijapên to ipa. Cwÿrjapê ri itajê pyrên ijakryti, wa ijõtpê ijakryti to cumã amji jarẽn to ipa.

¹³ Pê wa mam ajco Jeju to icakôc kêanre to ipa, ne itÿj ahna mehwÿ jahêr to ipa, ne ajco ame to kêanre to ipa. Cakrô mã Pahpãm teicaprĩ. Ampo na? Pê wa cormã nee Pahpãm jahkre pej nare, ne nee to amji mã ihmipej to ipa nare. Cwÿrjapê pê wa amji jahkre kêt kam apu to kêanre to hajÿr to ipa.

¹⁴ Mã me pajõ Pahhiti te ito kênre nare, ne amji wÿr ito ipipkjêr, wa hÿrmã ipipkjêr, ne toa amji mã ihimpej to ipa. Mã cute imã ihkĩnti na iton, cwÿrjapê wa me pahkwÿ cunea me, Jejumã me ajpên kĩnti to me amji hõnco to me ipa.

¹⁵ Ỳhÿ, pê ajpên pjê ita wÿr Jeju wrÿ, cute mehkrã kên pytâr xà caxuw. Hõhõ, ijÿjarên xà ita ri quêt ampeaj kam. Gapacta ne ana cuhkõnrecunea to harên xà ita na amji capa, ne to amji jahõt to apa. Ne papê wa me girõa pê ikrã kên cati.

¹⁶ Cwÿrjapê ri Pahpãm te icaprĩ, quê mehcunea me ipupu ne amji mã me ito:

— Pÿhàpà, ihhêj ne ihtÿj xãmte Pahpãm te Pawrõ kēanre ita to impej, wa ha hanea ne cuxà Pahpãm wÿr apkjê, quê ha ito impej. Mār wa Pahpãmcahê na itĩar na ipa, rohnÿtti mã — hane. Hõhõ, cute amji mã meito ihcakõc to hajÿr prãmte ri, Pahpãm te icaprĩ.

¹⁷ Ne imã mehcunea te Pahpãm pupun pejti na me to prãm. Pahpãm pê me pahcunea jõ Pahhiti, na pê nee jÿm ton nare, mã ihtĩar na hãn neihkrĩ. Quê nee jÿm hõmpun nare. He ampeaj kam ri pyxit peaj, ne pjê ita cunea kam cupê Pahpãm. Ne imã mehcunea te quêt Pahpãm catihti name hahkre pej, ne amji mã ahnamehpahàmti na imã me to prãm, rohnÿtti mã. Hamre.

¹⁸ Ỳhÿ ikra Timot, ikam gapacpeaj ne. Pê ramã Pahpãm jarkwa to mehcakõc catêjê me gápên xà ita jarên to:

— Pahpãm te amji mã acapi, ca ha apê me cumã gÿjarên pejti jarên catê — hane. Ne gápên

xà ita pêkrãhtare pijapu xà pyràac, ne ma harkwa itato amji japackre to apa, ne gõ Pahhiti mã gápên xà to impejti to apa.

¹⁹ Ca ha nee Jeju to amji mã ahimpej jicu nare. Por ca ramã ate ampo pejti ton xà jahkre pej ata, ca hanee ton jicu nare. Ne nee ajte mehkwy te mehajÿr nare, ne me cumã ampo pejti itajê jahkre pej cacrô, mã ihkaj na ihtÿj ame ampo kêanreton to me ipa. Ne ihtÿj hãn ne Jeju kôt meamji ton jicu, ne nee ihkôt me hakop ne me hahkre pej nare.

²⁰ Ne me hũmre pijakrut itajê pê ihtÿj ampo kên itajê to ame he: Himên me Arexãnre. Cwÿrjapê pê wa me pahcurê xwÿn pê Xatanaj jũhkra mã me haxà. Pê taa ame to kên ne me hapackre, mãr quênee jũ caxuw hipêr Pahpãm cuna mã amehcakôckên to me hajÿr nare.

2

*Timot te catyt kam mehkwy to ihhimpej xà
Me Hápên Xà 10.34-35; Epet 6.18*

¹ Ita caxuw wa ha ate mecuprõn xà kam, ate me acaca xà ton xà ata to meamã hahkre. Mam cati mã, quê ha me pahkwÿ cunea Pahpãm mã mehcakôc, ne cumã me ajpên cajrên, ne ahna me ahwÿ, ne Pahpãm catihti ne impejti na amji mã me harê. Ne Pahpãm te me cumã ampo cunea jõr atajê pyrên, quê ha me hakrya kam me cumã amji jarê.

² Ca ha mehkwy mã garkwa ta, quê ha mehcunea Pahpãm mã pjê jõ pahhi catêjê cajrên, ne krĩ to mehhimpej catêjê cajrên, ne cumã

ampo cunea to ihhimpejcatêjê cajrën. Ampo na? Cu haame ita to, ne caxwãm catia mã, catyt kam me pahkrĩ, neamji to me ajpa, ne nee me ajpën mãnnare, ne nee ame papijapu nare.

³ Ita to pahte me, na ri ihkênre nare. Ampo na? Pahpãm pê me pahpytâr catê ata mã pahte me ita ton xà itajê na prãm, ne ahna cumã impejti.

⁴ Pê mehcunea Pahpãm pê ampÿamã ajco ame ipa, mehkên ata wÿr. Ne Pahpãmri mehkên pê mehcunea tohapôj, ne ampeaj kam cute me harkwa pejti ita cuneajahkre pej na, cumã me to prãm.

⁵ Cwÿrjapê pê me pahwÿr ihcãmter Jeju Crixto kujate, cute Hũm me ajpën na me pajaxôr catê na. Ne taa mã quê ha pyxit peaj ne Pahpãm wÿr me paxũmre tocuprõ. Ne iràn xà na, jũ wÿr quê jũm Pahpãm wÿr me pahto apkjê.

⁶ Pê Jeju hàpên xà ita to hàpên to amji pytà, ne taa amji caprõa to me pajahpan xà na amgõ. Ita kôt quê ha mehcunea me hõmpu ne me hahkre pej, nãmri quê ha Pahpãm hõ amcroa kam mehcuneakên pê me to hapôj.

⁷ Cwÿrjapê ri Pahpãm te ito ijũjarën catê, ne ikujahêc, wa mehcahkrit pê, por me cupê Juta catêjê nare atajê mã harën pejti itajê to awjarê, ne me cumã to hahkre. Ne me cumã:

— Ca ha Jeju wÿr amji to me apkjê, ne toa amji mã me ahimpej, ne me apej mã ame apÿpÿm — hane. Nãmri ijũjarën xà ita ampeaj kam ri, wanee ame amã ihêj nare.

*Me hũmre te ihtÿj Pahpãm mã mehcahôc xà
Epet 5.22; 1 Petrô 3.1-7*

⁸ Ne imã pjê cunea kam me hũmre te Pahpãm mã mehçakôç na me to prãm. Ne Pahpãm mã mehçakôç catêjê atajê, quê ha catyt kam Pahpãm kôt me ipa. Ne nee ame ajpên curê nare, ne nee me ajpên mãnnare kam, Pahpãm mã mehçakôç.

⁹ Ita caxuw wa ha Jeju na mehkwỳ cahãj catêjê to icakôç, ne me hapackre to amã hahkre, jũ mãquê ha ame, ne ame amji cũmpej, ne amehkrĩ. Ỹhỹ, ca ha me hapackre to hane he:

— Nee ca amji mã me garkwa to: “Me hũmre cunea te me ikĩn prãmte, wa ha ijahĩ xà itajê cunea mã amji jacjê, cute kam me ikĩn, ne ikôt memprar xàcaxuw” hajỹr nare — hane.

¹⁰ Nãmri quê ha quêt caxwãm catia mã cute amehkwỳmã ampo pejti ton to ipa, ne Jejuna mehkwỳ na me amji jarên na, quê ha catyt kam me ipa, ne mehkwỳ tehcajpar to me ipa.

¹¹ Ne me cumã Pahpãm jarkwa to hahkre catêjê, quê ha cute me cuprõn xà kam me cumã to hahkre, quê aracri pyjê itajê mehkrĩ ne ame awpa.

¹² Quê nee pyjê nõ me hũmre nõ mã ampo to hahkre nare. Ne nee cupê me hũmre jõ pahhi nare. Ne cama amji caxuw ame hũmre kôpĩ, ne nee amehçakôç nare.

¹³ Ampo na mã wa pyjê na amã ihmpej xà itajê to ihmpej? Nee mã ampo nanare. Pê mam Pahpãm Atãw xwỳ xũmre ata to, ne hapu na Ewa xwỳ cahãj ata to.

¹⁴ Pê nee Xatanaj Atãw xwỳ mã ihhêj nare, ne Ewa xwỳ mã pê ihhêj. Ne taa mã pê nee Pahpãm te amji kam hapac xà impar nare.

¹⁵ Cwÿrjapê quê ha pyjê cunea mã mehkra hàà to hà. Nãmri quê ha pyjê itajê nõ te Jeju to amjimã ihhimpej, ne cumã mehkwy kïn, mã mehtehcajparrohnÿtti mã, ne nee ahti na ame hũmre na amji mã prãm nare, ne quêt caxwãm catia mã Pahpãam kôt ame ipa na, quê ha ihtÿj ihkên xà catia pê me amji pytà.

3

Timot te mehkwy to mehhimpej catêjê pyxwÿr xà

Tito 1.5-9

¹ Ita caxuw, wa ha ate me cuprõn xà jõ pahhi to me amã icakõc, ne me amã to hahkre. Quê ha jũm te Jeju na mehkwy to ihhimpej catê na amji to prãm na, quê ha hàpên xà impejti na amji to prãm. Ýhÿ, ite me gapackre xà ita ampeaj kam ri.

² Por Jeju na mehkwy to ihhimpej catêjê pupun catêjê atajê, quê ha me cupê hũmre impejti ne, quê nee jũm ampokên nõ na me harên to kên nare. Ne me cumã hĩxi pyxit peaj, ne hĩxi me ajpên na ajkrut peaj. Ne caxwãm catia mã mehpahãmti ne, ne nee ame amji mã hamãr nare nare, ne nee amji to me cati prãm nare. Nequêt ihcunea na me hàhcajrënti ne, me hũrkwa to, ne me cumã ampo pejti cunea to me cumã hahkre jahkre pej.

³ Quê ha nee cupê cõxÿhti to ihkõm catê nare, ne nee apu hàprê nare, ne quêt hàhcaprĩa kam, aracri ame to ihhimpej to ipa. Ne nee ihpore toamji to hakràj catia to ipa prãm nare.

⁴ Ne ihtÿj cumã hÿrkwa kam amji to ihhimpej jahkre pej, ne amji caxuw mehkra japackre, quê amji mã ampo cunea na, catyt kam me hÿpahti to me ipa. Cwÿrjapêquê ha ihtÿj cupê Jeju na mehkwy to ihhimpej catê na, me jÿm ata capi.

⁵ Nãmri quê ha jÿm ata pê hÿrkwa kam amji to ihhimpej jahkre kêatre na, jÿ wÿr quê ha apu amji mã hamã, ne amji to mehkwy to ihhimpej catê.

⁶ Ne mehkwy to ihhimpej catê ata, quê nee cupê curmã Pahpãm kôt ipa catê nare. Nãmri quê ha curmã jÿm ata te Pahpãm kôt ipa catê na amji ton, mã cute me to ihhimpej catê na me hãm na, quê ihhêaj to cama apu amji to cati prãm. Ne cute amji to amji jahkre pejti to prãm to ipa to hanea, pom pê mam me pahcurê xwÿn, ne amji curê mã amji mē, ita kôpit na, quê ha jÿm ihtÿj amji curê mã amji mē.

⁷ Na quê ha me cupê Jeju na mehkwy nare atajêkam mare mã, catyt kam ipa, quê ihtÿj me to amjimã ihcakôc to impejti ne. Quê ha cute hajÿr na, quê ha nee Xatanaj pê me pahcurê xwÿn ata cupê Jeju na mehkwy to ihhimpej tète ihcahpêrkàr nare.

Timot te hanea ne mehkwy jamãr catêjê pyxwÿr xà

⁸ Ýhÿ Timot, ita caxuw wa ha me pahkwÿ tehcajpar catêjê te amji kam hapac xà to amã hahkre. Jeju na mehkwy tehcajpar catêjê, quê ha caxwãm catia mã, catyt kam ame ipa, ne mehcajpar xà hêj xi nare to mehcajpar to me ipa to me prãm. Ne nee apu ampo cacôxÿhti catia

ne to ihkôm nare, ne nee ihpore to pit mã apu amji mã mehhimpej to me ipa nare.

⁹ Ne cute Jeju to amji mã mehhimpej ita na, quê amji to mehtÿj tu.

¹⁰ Quê ha mam me hàpên xà ita na me capi, quê ha cute hàpên xà ita to me hamâr na, quê ha me hõmpu, ne toa mehkwy tehcajpar catêjê.

¹¹ Mehprõ xwÿjê, quê hanea catyt kam, caxwãm catia mã ame ipa. Quê nee mehkri ne ame harkwa te wônare, ne quêt catyt kam, caxwãmcatia mã, me amji kam hapac to me ipa, ne ihtÿj ampo cunea na me amji jarkwa par to me ipa.

¹² Ne Jeju na mehkwy tehcajpar catêjê mã quê ha mehprõ pyxit peaj, ne ahpyanre na amji mã mehkra to me ipijapar to mempeaj ne.

¹³ Quê ha cute me hàpên xà to impejti na, quê ha mehkwy cunea amji mã me hÿpa to ipa. Cwÿrjapê quê ha ihtÿj Jeju to cute amji mã mehhimpejna, me amji jarên to me ipa.

*Pê Pawrô hipêr Timot mã Jeju kôt harên pejti
Epet 2.19-22*

¹⁴ ÿhÿ Timot, wa awÿr ikrâr, ite apupun prãmte, ne jÿ wÿr wa ha awÿr tē, amcro itajê nō na, cwÿrjapê wa ite amã ihhōc, ne amji cumam amã ihkujahêc.

¹⁵ Nãmri wa ha cormã ita ri apu ikên, quê ha mam ihkàhhōc ita me awÿr cato, ne me pahkwÿ te cuprôn xà kam me pahte me amji ton xà ata to meamã hahkre, jÿ mã cu ha amji to me pahhimpej xà to. Ne me pahte cuprôn xà ita pê cama pahte me cuprôn xà nare, ne cupê

Pahpãm te cuprõnxà. Ampo na? Pahpãm ihtỳj me pahcunea kam amji to ajpa. Cwỳrjapê ri ihhêj rũm me papê, pom hãn ne ikre jicjêc ikre cajpar to ihcuhhê itapyràac, na cu Pahpãm mã cute amji kam hapac xà cunea mã me pajũcanãr to me pahcuhhê, ne ma mehcajpa.

¹⁶ Ỡhỹ, pom Jeju jarẽn xà ita peaj to impej. Ne taamã ri catyt kam me papa na me pahtehcajpa. Pê cu mam nee me pahnõ hahkre pej nare, ne ita caxuw ri me pahcunea mã hahkre pej. Na cu ha ampo itajê cunea na amji mã Jeju to me hane he:

Cupê Pahpãm cakrô, pê ajte me pajĩa na amji to ajpê.

Mã Pahpãm Carõ Pejti te hõmpun, ne catyt kam ipa na harẽn.

Mã cõjkwa kam Pahpãm mã memprar catêjê te hõmpun.

Mã pjê cunea kam harẽn xà ita picràn.

Mã pjê cunea kam mehkwy te mempar, ne ihkôat me amji ton, ne ma me hũnãr.

Mã hacpyã mã Pahpãm te to hàpir, cõjkwa wỳr.

Hõhõ, pahte Jeju to amji mã me pahhimpej xà ita ampeaj kam ri.

4

Pê Pawrô Timot mã cute me ampo kên to hahkre catêjê cawpa

Coroxo 2.16-19; 1 Timot 3.1-9; 2 Petrô 2.1-3; Juta 3-16

¹ Ne ampo itajê cwÿrjapê wa ha hipêr cute ampo kênto me amã hahkre catêjê na me amãihhóc. Ýhÿ, ramã Pahpãm Carõ Pejti te hirãa pê me harên, quê ha ihtÿj jũ caxuw Jeju na mehkwy kwÿ, Jeju te amji mã mehhimpejjicu. Mã me pahcurê xwÿn Xatanaj pîn, cupê jarôti pê ampo carõ kên, pê Xatanaj mã hâpên catêjê atajê me hapôj. Mã Jeju na mehkwy kwÿate ampo carõ kên itajê kwÿa to amji mã mehhimpej to me ipa. Ne ampo carõ kên itajêa kôt me cumã ihhêj xi xà kên atajê cunea to hahkre.

² Ne pom cute me ampo to hahkre catêjê itajê pê ihhêj rûm ampeaj kam ampo to hahkre catêjê, ne nee mã ampeaj kam nare, mehhêj xi to pitmã ame cumã hahkre to me ipa. Neramã me cupê mencaca xà cunea ihkêanre, mã nee me hahkre pej nare kam, ihtÿj impej na amji mã me to hane.

³ Ne me hÿmre itajê te me cumã ampo to hahkre xà itajê te hajÿr he:

— Ca ha nee pyjê nõ me gikwa nare, ne ahte apu apa, ita na ri Pahpãm mã impej — hane. Ne hanea ne xwahna, por ampo kur xà impejti atajê, quê ha neeamehkur nare. Ne cama ame cumã ihhêj, nepom Pahpãm te ampo cunea kur xà tonitajê, nee ihkên nare, ne impej pit, Pahpãm kôt me ipa catêjê mã. Ampo na? Pahpãm mã me pahkĩnti, mã me pamã ampo pej pit gõ, ita na ramã me pahte mehahkre pejtu. Ne me gâpàn xà wÿr, ca ha xa mam me gõ pyrên me gakryti na Pahpãm mã me amji jarê.

⁴ Ne pom pê Pahpãm ampo cunea to itajê impej pit, cwÿrjapê cu nee ame papijacri xà atajê cupa nare. Ne gapacta ne ampo itajê cunea na me amji

tohpôj, ne Pahpãm mã me harẽn to hane he:

— Ýhỹ me ijõ Inxũ Cati, ate me imãampo pejti jõr, itajê pyrên ampeaj kamme ijakry — hane.

⁵ Hõhõ, ca ha Pahpãm jarkwa to Pahpãm mã me acakõc to me hane, quê ha me apijacri xà mã, ampo cawpa xà itajê cunea hamre tu. Ampo na? Pahpãm mãampo itajê cunea impej pit.

*Quê ha Timot pê Jeju mã hàpên catê impejti
1 Timot 1.6-16; Tito 2.1-8*

⁶ Ca ha atỳj ite gapackre xà ita to, Jeju kam me pahte ajpẽn to me pahkjêjê atajê mã hahkre. Ca ha ate ita tohajỹr na, ca ha apê Jeju mã gápên catê impejti ne. Hõhõ, ca ha hane, ne Pahpãm jarkwa kõt amji ton toapa, ne me cumã harkwa to hahkre to apa, ne atỳj acaxwỳn to amji mã ihtỳj to apa. Ampo na? Ampeaj kam ri Pahpãm jarkwa ita, nee mã ihhêj xi nare.

⁷ Ne ihkĩnte me aquêjtjê jũjarẽn hêj xi xà to me apijacri catêjê mã ampo cawpa xà, itajê kõt hamreare. Na ca ha nee ihkõat me amji ton to me apa nare. Ne quêt Pahpãm jarkwa pejti atajêto, ca ha me hahkre to me apa, ne catyt kam ihkõat me amji ton to me apa.

⁸ Cu ha me pajápên xà pytĩa tome pajápên to me papa, ne pahtỳj pajĩ cuneakam ame pahcarõhrõt. Ne ampeaj kam ame pajĩ hi tỳj. Jĩkjê na cu ha Pahpãm mã pajápên to me papa, ne amji caxwãm pê amji mã me pahcaxwỳn to ihtỳj tome hanea, pom quê me pajĩ kam pahcarõhrõt hi tỳjti he. Ne me pahcaxwỳn tỳjti ita ri me pajĩ hi tỳjti ita jirõa pê impej. Ampo na? Quê ha ihtỳj

me pajĩ mepahhi tỳjti ita jũ caxuw hamre, ne me pahcaxwỳn quê ha quêt jũ caxuw hamre nare.

⁹ Ita caxuw wa ha ampeaj kam ite me amã ampo to hahkre xà ata to me amã hahkre. Ca nee me anõihcaca nare, ne atỳj ana cuhkõnre cunea to ahna amji capa, ne toa amji mã me ahimpej to me apa.

¹⁰ Pahpãm ihtĩar ihkrĩ ata pê ri me pahkên pê me pahto hapôj catê. Ne toa, cu amji mã ame pahhimpej, ne ma amji to me hikaj to me papa. Cu pahte mempar, cwỳrjapê cu pahtỳj hâpên xà catijàhtôa itajê to me pajâpên to me amji cujtên to me papa.

¹¹ Cwỳrjapê ca ha ijarkwa itajêa to me cumã hahkre to me apa, quê toa amji mã mehhimpej to me ipa.

¹² Quê ha me pahkjêjê nõ atuwre na ato ihcakôc, canee jũm ata kam gapac nare. Ne cormã atuwre cakrô, ca catyt kam apu apa, ne catyt kam acakôc to apa, ne amã mehcunea kĩn, ca me caprĩ to apa, ne Jejua to amjimã ahimpej na apahãmti to apa. Quê ha me pahkjêjê kwỳ catyt kam ate apana me apupu, ne hanea ne acuxà catyt kam me ipa.

¹³ Cwỳrjapê ca ha atỳj me cumã Pahpãm jarkwa pejti ita cahyt, ne me cumã Jeju pê me pahkritxwỳ jarên xà impejti jarên to apa. Ne me cumã Pahpãm te amji kam hapac xà cunea capô partu to apa, wa ha ahnaa me awỳr icato.

¹⁴ Pê ca cormã gâpên nare kam, pê Jeju na mehkwy to mehhimpej catêjê me akrã na me hũxi, ne Carõ Pejti jarkwa kôt me garên to hane he:

— Ita caxuw, ca ha Jeju na mehkwỳ jarkwa me, Jeju jarkwa kôt, me cumã Pahpãmjarkwa jarěn pejti itajê to hahkre to apa — hane. Pê Pahpãm amã acarôt tỳjti atajê jōr partu. Cwỳrjapê ca ha jũ caxuw ita to gapac kêt nare.

¹⁵ Hō, gápên xà ita mã, ca ha amji jōr to apa, ne ma apicaměn to mō, mehcunea kam mare mã.

¹⁶ Ca ha atỳj catyt kam apa na amji jamār to apa, ne me cumã ampo to hahkre na amji jamār pejti to apa. Ca ha hane, quê ha Pahpãm ihtỳj cute me akam hapac catêjê me, me akên pê ato hapôj to ipa.

5

Jeju na mehkwỳ te ajpěn to mempejti xà 2 Timot 2.24-25

¹ Ỳhỹ, wa ha pahte me ajpěn to mempejti xà jarě. Quê me pahkjêjê ame ampo kên ton to me ipa, ca me cumã, quê catyt kam ame ipa. Ne mehwej catêjê, ca hame cumãn kên nare. Ampo na? Ramã quêt acumam ihwejtu. Ca ha cama cumã acakôc, ne hapackre to hane, pom quê ca me apãmjê mã me acakôc to me apa he. Ne pom ca hapu na me akjêjêa japackre atã na, ca ha akôt mentuwre atajê japackre to hane.

² Ne nee pyjê wej itajê mãn kên to apa nare to hane, pom ca me axyrxwỳ na me apahàm, ne nee me cumännare he. Ne atỳj me cuprỳ na apahàmti to hane, pom ca me akjêjê na apahàmti he.

*Pyjê wej pê mempjê tyc, pê hamreare atajê
tehcajpar xà*

Tijac 1.27

³ Ne hanea ne me pahkwya cahãj wej, pê mempjê tyc atajê, ca ha me ahna apahãm jãhtôti to me apa.

⁴ Quê ha me pahkwý nõ pê impjê ty ita cumã ihkra, ne cumã ihtãmxwý, quê ha nee mehkwy cunea mehtehcajpar nare, ne quêt mehtãmxwý me, mehkra itajêa quê ha mehtehcajpa, ne me cumã hõ gõ. Ampo na? Pê mam mehkra itajê me, mehtãmxwý itajê kryjre na ihtýj ajco me cumã hõ gõ, ne me to ajpa, jahpan xà na quê haihtýj me to ajpa, ne me cumã me hõ gõ. Hõhõ, ita na ri Pahpãm mã impej, ne ahna cumã prãm.

⁵ Nãmri quê ha jũm cahãj ata caxuwhamreare, ne nee hũkjê nare, quê haamji tehcajpar xà na ihtýj amcro me, caxwa cunea kam ihkrĩ ne Pahpãm wý.

⁶ Ne por pyjê pê me pahkwya cahãj pijapit, ihtýj hãn ne mehkwy kĩnte ame hapactu to me ipa, ne amji na me ampo cwýr to me ipa atajê, quê ha nee me pahkjêjê kwý me hõ to ame hamãr to me ipa nare. Ampo na? Pom pyjê te hajýr catêjê itajê, ramã me caxwãm pê ihhêj ne amehtyc.

⁷ Cwýrjapê ca ha Timot, pomite me hapackre xà ita to, ca ha me hapackre, ne me cumã to hahkre to apa. Quê ha me akam hapac, ne catyt kam me ipa na, quê ha nee jũm me ahna ihcakóc kên nare.

⁸ Ne por quê ha jũmjê amji to hũkjê atajê, nee me amji to mempej nare na, ne nee hũrkwa kam

ame hamãr to impej nare na, quê haramã Jeju to amji mã mehhimpej jicu, ne amji to me cupê Pahpãm kôt ipa catêjênare atajê pyràac, ne me hirôa pê ihkêanre ne.

Mehkwý te pyjê wej pê mempjê tyc tehcajpar xà

⁹ Ne por mempíjapit pê me hũkjê nare atajê, ca ha me haprý nõ, por amji tehcajpar xà na me prãm atajê, mãr quê mehkwy mehtehcajpa. Porpê mempjê to pyxit ita kam mempíjapit, ne ramã me ahna caku te xêjxênta jirôa pê atajê, ca ha me haprý nõ.

¹⁰ Quê ha jũm mehcunea mã impejti na, quê ha ramã me hõmpu, ne me hahkre pej, ne amji mã me harên to ipa. Quê ha jũm ita mehkra nõata to ipíjapar to impejti, ne cute krĩxàre kwýmã hõt xà na hũrkwa jahkre to ipa na, ca ha me haprý nõ. Ne hanea ne, por me pahkjêjê kwý mãhápên to ipa, ne hanea ne me cupê hamreare atajê tehcajpa, ne me hà catêjêtehcajpar to ipa, ne ampo to hápên xà impejti atajê cunea mã cute amji jõr to ipa atajê, ca ha atýj me haprý nõ.

¹¹⁻¹² Ne por cormã mempíjapit tuw atajê kwý te Jeju na me amã amji to ihhimpej ne, me amã:

— Wa ha hirãa pê Jeju me, me ca mã amjito ihimpej, nãmri wa ha itýj me pahkwýtehcajpar to ipa, ne nee hipêr jũmme ijikwa nare — hajýr. Ca ha me haprý nõr cakrô, quê ha ihtýj cormã jũm impjê to prãm. Ne cama cute amji to ihhimpej xà ata to hapac kêt, quê ha Pahpãm mã ita na ihkĩn nare, ne ahna cupê ihkaj na. Cwýrjapê ca ha mentuw japrý nõr nare. Ampo

na? Quê me ahna ahtũm nare, quê ha ihtỳj hipêr me hĩkwa tuw prãm.

¹³ Ne me cupê mempjê tyc tuwre catêjê kwỳ te hajřar he, quê ha itajê ma krĩ cape na ame ipa, ne ampeaj kam me cumã xuwcaca, ne me xwahna xi, ne neeamji na me hũcapi nare, ne cama mehkwy na amehcakôc kêanre to me ipa.

¹⁴ Cwỳrjapê ri hacpỹa mã imãhipêr pyjê pijapit tuw itajê jikwa tuw, nemehkra me, me hũrkwa to mehhimpej na, me to prãm. Hõhõ, quê ha ita to ame hane, quê ha nee me pahcurê xwỳn catêjê ame pahna ihcakôc kên nare.

¹⁵ Ne ihhêj ne ramã mempijapit kwỳ te me Pahpãm jõ pry cupan, ne me pahcurê xwỳn pê Xatanaj jõ pry pynãr.

¹⁶ Quê ha jũm cahãj jũrkwa kam jũm impijapit, quê ha taa ihtehcajpa, ne ma hamã. Quê ha nee ipu na, ahti na, Jeju na mehkwy mehtehcajpar nare. Jũ na quê ha Jeju na mehkwy ihtỳj mehtehcajpa? Quê ha quêt me hũkjêhamreare, ne me caxuw hamreare, ita ri quê hamehkwy kwỳa ihtỳj mehtehcajpa, ne me hamã. Hõhõ, ite amã mempijapit to icakôc to hahkre xà ita to, wa ite amã hahkre.

Pê Pawrô Timot mã mehkwy to mehhimpej catêjê to hahkre

Me Hàpên Xà 14.23; 1 Petrô 5.1-4

¹⁷⁻¹⁸ Ne ita caxuw wa ha me cupê me pahkwỳ to mehhimpej catêjê to amã icakôc, ne me to amã hahkre. Pê ramã Pahpãm jarkwa na, ihkàhhôc kam ihhôt ata me pamã hũjarên to hane he:

“Quê ha jũm te amã hàpên na, ca ha atỳj cumã gãmjõr to impejti ne.
 Ne quê hanea ne pryti xũmti jàpên catêjê nõ amã apê, ca ha neeharkwa na hê nare, hàpàn têtê, quê ha taa ihtỳj apà, hàpên xà kam” hane.

Pyràc pej ne quêha me pahkwỳ jõ pahhi atajê me hàpên xà toimpejti na, quê ha mehkwy me cumã hàmjõr to impejti ne. Quê ha Pahpãm jarkwa to me cumã hahkre catêjê me cumã ihcakõc to impejti, ne catyt kam, cute me cumã ampo to hahkre to me ipa na, quê ha ihtỳjmehkwy me cumã hàmjõr to catia ne.

¹⁹ Ne ihnõ xwỳjê, quê jũm pyxit peaj ne Jeju na mehkwy to mehhimpej catêjê nõ to amã ihcakõc kêanre na, ca ha nee impar nare. Nãmri quê hamencrê ne ajpêan kôt me amã to mehhimpej catêjê nõ jarên to kêanre na, ca ha cormã atỳj me kampa.

²⁰ Ca ha me acunea te ramã mehkwy to mehhimpej catêjê nõ te amji mã hamãr nare, ne cute ampo kên ton na ate me hahkre pej na, gapacta ne kam mare mã me cumã, quê ha mehcunea me hõmpu, quê ha ihtỳj me amji mã pa, ne ton jicu.

²¹ Ỳhỹ Timot, wa ha Pahpãm me, ihkra Jeju me, cõjkwa kam me cumã imprar catêjê kam mare mã, amã ijarkwa ita ta, ca ha ijarkwa ita pa, nema to amji japackre. Ne ihkõat me cumã ampo itajê cunea to hahkre to apipênti to apa. Ne nee ca amji mã gõ kwỳ nõ to impejti prãmte, nee cumã ite amã ampo to hahkre xà itajê nõ to kyre

pê hahkre to ihcajucre nare. Ne nee jūmmã amji jirôa pê ampo itajê nõ to hahkre nare, ne me cumã ampo itajê to hahkre to apipēnti to apa.

²² Quê curmã jūm amji to Jeju na mehkwy, ca ha nee cormã ne pahhi na me hãm nare. Ca cormã ne pahhi na me hãm, quê ihhêaj to cormã hàpên xà peacre, ne ihtyj ampo kêanre to, quê ha me gápên xàita kôt hamreare ne. Ne nee cute mehkên ton catêjê kôtme akên mã acjêj nare, ne quêt ihcunea na, apejti, ne apahàm jàhtôti to apa.

²³⁻²⁵ Ne mehkwy hãn ne me kam maremã ampo kêanre to, mã Pahpãm te me pahcukij xàxwýjrea na mehcunea mã hahkre pej. Ne mehkwy aracri me ampo kên to, mã nee me hahkre pej nare, ne Pahpãm mã ramã me hahkre pej. Ne Pahpãm te me pahcukijxà kam, cu ha me pahcunea me hõmpu, ne me hahkre pej. Ne hanea ne ita xwýjê na cute hajyar he, mehkwy ihtyj hãn ne me ampo pej pit to, mehkwy kam mare mã. Ne mehkwy hanea ne aracri me ampo pej pit to, mã nee mehkwy me hahkre pej nare. Mã ihtyj Pahpãm me hõmpu, ne me hahkre pej. Taamã, xãmte cormã ihnõ, ca gõtépêgitô kre me atu xàa na apu apa, cwýrjapê ca ha cô topit mã akõm nare, ne hanea ne pìxô cacô xyre kryjre ne to akõm to apa.

6

Pê Pawrô Timot mã cama me cumã hàpên catêjê to hahkre

Epet 6.5-9; Coroxo 3.22-4.1; Tito 2.9-10; 1 Petrô

2.18-25

¹ Ita caxuw wa ha me hàmcwỳr nare, ne cama me hàpên catêjê atajê pê Jeju na mehwỳ to me amã awjarê. Ýhỹ, me hàpên catêjê cunea teihtỳj amji mã me hõ pahhi cupa xà, mãr quê nee jũm me pahte amji kam me pajapac xà to hahkre xà atajê na, Pahpãm na ihcakôc kên nare.

² Quê cama me cumã me hàpên catêjê jõ pahhi pê Jeju na mehwỳ na, quê nee cumã hàpên catê ata amji mã harkwa to:

— Ipê ijõ pahhi kjê, cwỳrjapê wa ha neecumã ijàpên cati nare — hane. Quê amji mã hajỳr nare, ne cama quêt harkwa to:

— Ijõ pahhi pê imã ikjê kĩnti ata ri ijàpên xà jahpan xà na hàmcwỳr to ipa, cwỳrjapê wa ha cumã apêa to apê — hane.

Pê hipêr Pawrô cumã, cute me cumã ampo kên to hahkre catêjê cawpa

Ruc 12.13-21; Tijac 5.1-6

³⁻⁴ Ca ha ampo itajê to me cumã hahkre, ne ahna me to ahimpej to apa. He Pahpãm me pamã catyt kam me papa tohahkre. Quê jũm me Pahpãm himpej xà me, me pajõ Pahhiti pê Jeju jarkwa kaj na, cute me cumã ampo to hahkre na, ca ha ramã me hahkre pej pyrentu, amji to cati prãmte ri apu hajỳr to ipa, ne cupê amji jahkre kêatre. Ne me hũmre itajê hãn ne me ajpên mãn prãmte, Pahpãm jarkwa kryjrecwỳrjapê me ajpên mãn kam pra, ne tee ame ipijapu to prãm. Mã ahna me cuprõ, ne mehkrã, ne me toihcuhhê atajê hanea ne me ipijapu to prãm. Nemehkwỳ me hũ na me amji to prãm, ne

mehkwỳ ajpẽn kam ame hũn kēanre, nemehkwỳ mehçakôç xà incràre, kôt hamreare atajê to uu ne ajpẽn krac ri mehçakôç jicu nare.

⁵ Ne pom ame ita ton to ipa itajê, hãn ne mehrã acto tu, mã nee ame amji kam hapac nare, ne me cumã mehhêj xi to pit mã ame-çakôçjahkre pej. Ne cute me amji kam hapac xà kēanre cupan itajê to ri ame amji kampa he:

— Wa itỳj jũ na amji ton to prãm, ijakràj prãmte. Wa ha Jeju na mehkwy mã axà, ne Pahpãm mã apê, ne cumã ijapên ita kam wa ha amji to ijakràj — hane.

⁶ Cu ha me pahte catyt kam me papa na, quêha te me papê me pajahcukrêj crêre çakrô, cu ha me hõmpu, neme amji mã:

— Mã hã, wa ha tahnaa mã me — hane. Hõhõ, pahte me pajahcukrêj to amji kam me pajapac xà ita na ri Pahpãm mã me pahto prãm. Ne ramã me pajakràaj to me pajakràj.

⁷ Ne me pahpỳpỳm xà kam, ampo to pê cu pjê wỳr ame pahpỳpỳm? Hamreare, nee pê cu ampo to ame pahpỳpỳm nare. Ne me pajũ kam ame pahpỳpỳm. Na cu ha me ty, ne ampo to cu ha ame pra, pjê ita pĩn, cõjkwa wỳr? Hamreare, cu ha me pajũ kam hacpỹ mã ame pra.

⁸ Měr hõhõ, quê ha me pamã me pajõ, ne me pahkà, cu ha pahtỳj hũrên ame pajakry, ne me amji mã:

— Mã hã, cu ha ahnaa mã me — hane.

⁹ Ne por me pajõ me, me pahkà jirôa pê amji to me hakràj prãm catêjê itajê pê ihhêj rũmahtorore pê amji jahkre kēatre ata pyràac. Mã arỳjhy xen te kwỳç mã acjêj, mã mehpro,

mã hãn ne mehcuraata pyràac, ne ihpore na mehprãmtiita to ihtÿj mehkên mã me amji rên prãm to me ipa.

¹⁰ Me pahte ihpore kïnti atajê pê ampo kên cunea xakat. Ne me pahkwÿa kwÿte me ita par pej nare kam ri, cute me Jeju jõ pry rên, ne to amji mã mehhimpej jicu, ne pea me hĩ caxwãm pê cute ame caxwÿn itajê jaxôp, ampo kên itajê to. Cwÿrjapêca ha Timot, ma ampo itajê cunea pê amji to gapôj to apa.

Timot te ampo cunea mã hũcanãr xà

1 Timot 2.1-7

¹¹ Ýhÿ Timot, apê Pahpãm jõ me hũmre nõa, cwÿrjapê ca ha quêt mehcunea to amjikam gapac xà to apipênti to apa, ne quêt Pahpãm te amji ton xàa kôt, catyt kam amji ton to apa. Ne quêtJeju to amji mã ahimpej to apa, ne quêt mehcuneato imej, ne amã mehkïnti ne. Ne quêt gápênxà ita kam, ca ha to acrà necumã gũcanãr to apa, ne neeme hirôa pê amji ton to apa to prãm nare.

¹² Ne cama Jeju te amji kam hapac xà kôt to amji cujtên kam to acrà tu, ita na ca ha gôtpê cahi na akrĩ, rohnÿtti mã. Hõhõ, pom ite amã ampo tohahkre par itajê kôt, quê ha jũ caxuw acaxwÿn ihtyc nare, ne quêt Pahpãm cahê na atĩr rohnÿtti mã. Pê ca me hàhtô kam mare mã amji jarên to hane he:

— Wa Jejua to amji mã ihimpej, ne ihkôat ipa, ne cumã ijàpên to ipa — hane. Pê amcro ata na Pahpãmmana ahwÿ, ca Jeju cape na apa rohnÿttimã xà caxuw.

13 Ỡhỹ Timot, wa ha amã ijarkwa ta, Pahpãm meJeju kam mare mã. Pê Pahpãm ampo cunea mã amji toipijapar xà caxuw, cumã cute amjikam hapac xà gõ. Pê Jeju krĩ jõ pahhi pê Pirat cunamã cupê Pahpãm kra na amji jarẽn to impejti. Wa ha Pahpãm me Jeju kam mare mã, amã ijarkwa ne amã:

14 — Por ite amã ampo cunea to hahkre atajê, ca ha ampeaj kam kampa, ne catyt kam apa ita na, quê ha ahnaahacpỹ ne me pajõ Pahhiti pê Jeju Crixto teamji jaxàr xà jõ amcro kam ahtwý — hane.

15 Quê ha Pahpãm hacpỹa ne pjê ita wýr Jeju kujate. Ne Pahpãm pyxit peaj, ne cupê mehcunea jõ Pahhiti, mã mehcunea impejti na me cumã harẽ, ne cupê pahhi catêjêcunea jõ Pahhiti, ne cupê mehhimpejcatêjê cunea to Ihhimpej catê cati.

16 Ne pyxit peaj, quê ha nee jũcaxuw ihtyc nare. Ne pyxit peaj ne impeaj toimpej. Ne impej ita pê ihhêj rũm pyt cuna mã irĩt xà prà. Ne jũ wýr quê jũmhõmpun mã awcanã. Ita pyrác pej ne, jũ wýr quê me paxũmre kêanre nõ awcanã, ne Pahpãm pejti ata na ahtêp ne hõmpu. Rý jũ caxuw jũm te hõmpun nare, ne jũ wýr cu me pahnõ hõmpu. Quê ha pjê cunea kam mehcunea amji mã me hũpa. Ampo na? He pyxit peaj, ne cupê me pahcunea to ihhimpej catê, rohnýtti mã.

Pê Pawrô Timot mã cute me hakràj catêjê to hahkre

Ruc 16.9

17 Ne wa ha cormã hipêr amã me hakràj cati atajê to icakôc crire ne. Ne por pjê ita kam me hakràj cati atajê, ca ha me cumã, quê ha nee ameamji to cati prãm nare, ne nee me hõ pore to pit mã ame amji to ipijapar to prãm to me ipa nare, ne quêt Pahpãm to quê amji mã mehhimpej to prãmto me ipa. Ampo na? Quê ha ihtyj jũ caxuw hõ pore ata hamre, ne Pahpãm quê ha quêt jũ caxuw hamre nare. Ne Pahpãm mã me pahkĩn, na ri me pamã ampo cunea jõr to catia to ipa, mã hũrên me pajakryti.

18 Ne me hakràjti atajê mã garkwa ta, quê mehkwy to impeaj ne, ne pom cute mehkwy to impejti ita to, quê ha hakràj cati. Ne me to hãhcajrënti to ipa, ne ihtyj mehkwy mã me hàhcukrêj jõr to me ipa.

19 Quê ha cute ita to ame hajjyr na, quê ha kÿj pê, Pahpãm cahê na, amji mã me hàhcukrêj itajêato cuprõ. Hõhõ, quê ha me hane, ne Pahpãmcahê na amji to me ipijapar rohnÿtti mã.

Pê Pawrô Timot mã amji jarê

20-21 Ÿhÿ Timot, pom ite amã ampo jarên itajê, ca ha amji mã nõr to impeaj to apa, ne ma to amji japackre ne ihkõat apa. Ne me akwy kwya hãn ne Pahpãmmã ampo kĩn nare atajê to pit mã amehcakôc to me ipa, ne me amji jarên to mehhej xi to:

— Me imã ri quêt ampo itajê cunea jahkre pej — hane. Cwÿrjapê ri ramã cute me Pahpãm jõ pry cupan ne mehhyr, ne Jeju te amji mã mehhimpej jicu. Ne ca, ca ha cute me hajjyr catêjê pê ampya mã apu apa. Ne hamre, imã

Pahpãm jarkwa kôt me apeaj na me apa na me
ato prãm. Hamre.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a